

Cuira, ils 20 lügl 2023

Communicaziun a las medias

## **Cuors intensivs da rumantsch vallader a Scuol** **Quist on cun ün nouv record d'annunzchas ed ün program cultural public**

**Dals 24 als 28 lügl 2023 spordscha la Lia Rumantscha per incumbenza da l'Uniun dals Grischs cuors intensivs da vallader a Scuol. Quists cuors pussibilteschan a tuot las personas interessadas d'imprender, d'ameglrar o da perfecziunar la lingua scritta e discurrüda in Engiadina Bassa e da tilla dovrar activmaing. Quist on per la prüma jada cun ün program cultural public e cun ün nouv record d'annunzchas.**

Cun raduond 150 annunzchas haja dat quist on ün nouv record da personas interessadas als cuors intensivs da vallader. In tuot daja 14 differents cuors – da cuors classics chi correspuondan als differents livels dal cudesch d'instrucziun «In lingua directa» e cuors da conversaziun per personas avanzadas, ma eir principiantas, fin ad ün cuors da litteratura. Sper ils cuors intensivs in classa da l'avantmezdi vegn spüert l'uschè nomnà chant avert avant cha las lecziuns cumainzan.

Ultra da quai survegnan las partecipantas ed ils partecipants ün'invista illa cultura rumantscha, in special in quella ladina. Quai nu capita be illas lecziuns in classa, dimpersè eir d'ürant il program accumpagnant cultural facultativ. El as cumpuona da referats, da guidas, lavuratoris e da contacts cun personas rumantschas.

### **Occurrenzas publicas per üna e scodün**

Per la prüma jada insomma es l'access ad üna part da quist program cultural avert eir al public interessà. Dimena pussibilitats per star da cumpagnia ed as barattar in rumantsch – tant per indigenas ed indigens sco eir per personas chi impredan la lingua. L'entrada a las occurrenzas es libra.

Las seguaintas occurrenzas sun publicas:

- prelecziun «Notizchas dal paur da Sandet», Romedi Arquint preschainta seis raquints lündeschdi, ils 24-07-2023 a las 18.30 in sala cumünala a Scuol  
L'occurrenza vegn organisada in collavuraziun cun *l'Uniun dals Grischs*.
- concert «In Movimaint», Cinzia Regensburger preschainta seis nouv album «In Movimaint» mardi, ils 25-07-2023 a las 17.00 illa baselgia San Lurench a Sent  
L'occurrenza vegn organisada in collavuraziun cun *Concerts illa baselgia da Sent*.



- prelecziun «Vi da che ch'eu pens minchatant» dad Oscar Peer, Mevina Puorger preschainta prosa cuorta dad Oscar Peer  
mardi, ils 25-07-2023 a las 18.30 i'l local da cultura BES a Scuol  
L'occurrenza vegn organisada in collavuraziun cun *editionmevinapuorger*.
- Cafè rumantsch extra muros: prelecziun «Il blau tocca la terra», Tina Planta-Vital prelegia our da sia ouvra  
gövgia, ils 27-07-2023 a las 10.00 in sala cumünala a Scuol
- prelecziun «Zina, zina zana, sco chi vegnan vana», Dumenic Andry preschainta seis nouv cudesch cun prosa cuorta  
gövgia, ils 27-07-2023 a las 18.30 in sala cumünala a Scuol  
L'occurrenza vegn organisada in collavuraziun culla *Chasa Editura Rumantscha*.

Ils cuors intensivs da vallader han lö dals 24 als 28 lügl 2023 a Scuol. Respunsabel per l'organisaziun dals cuors ed il program accumpagnant es Linard Martinelli, promotur regiunal da la Lia Rumantscha.